



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

Kolegij načelnika USK-a

U Bosanskoj Krupi održan je Kolegij načelnika Unsko-sanskog kantona, na kojem je prisustvovao načelnik naše Opštine, Zlatko Hujčić.

U prvom dijelu sastanka gradonačelnik i načelnici su razgovarali o situaciji u lokalnim zajednicama, problemima s akcentom na investitore i privredna ulaganja, a u drugom je od strane gradonačelnika Grada Tuzle Jasmina Imamovića prezentirana inicijativa za ukidanje kantona u Federaciji BiH što su načelnici **jednoglasno prihvatili i pružili podršku.**

“Razgovarali smo i o položaju investitora i mogu reći da je zajednički stav da mi u radu u lokalnim zajednicama najviše vremena moramo posvetiti privlačenju investitora po svim oblastima jer je način povećavanja broja zaposlenih. Iskazana je bezrezervna podrška svemu onome što je u zakonskim okvirima da se ti investitori privuku, da se održe na našim prostorima, u svakoj općini, i dogovoreno da ćemo u narednom periodu pokušavamo iznaći način da svi zajednički djelujemo pozitivno na te stvari, da iznalazimo rješenja u konkretnim problemima kao što je ovaj aktuelni u Bosanskom Petrovcu sa gospodinom Arifagićem”, naglašava načelnik Bužima.

“Glavni je problem što smo svjetski rekorderi po broju ministara, poslanika, savjetnika, pomoćnika ministara, na broj stanovnika. U Federaciji je 111 premijera, 142 ministra, 300

pomoćnika ministara, 300 savjetnika premijera i ministara, na stotine poslanika, preko 1000 članova komisija kad su u pitanju skupštine kantona, a kad su u pitanju vanbudžetski fondovi isto tako blizu 1000. Hoćemo da umjesto 35 vanbudžetskih fondova bude 5, da se obezbijede uštede, a da u tim fondovima svaki kanton bude podjednako zastupljen”, pojašnjava gradonačelnik Tuzle.

Dosadašnje inicijative oko izmjene ustavnog sistema, kako kaže Imamović, propale su jer se odmah išlo na **Dejtonski sporazum** što je nemoguće.

U nastavku je Gradonačelnik Imamović rekao kako će nastaviti razgovarati i obilaziti ostale gradove, vjerske zajednice i interesne grupe na području Federacije BiH.



Kolegij načelnika USK-a

Tematska sjednica: Mjesne zajednice

Dana, 6.4.2017. godine, Opštinsko vijeće Bosanskog Petrovca je održalo 1. tematsku sjednicu, sa početkom u 12 sati.

Na dnevnom redu bila je jedna tačka, Izvještaj o radu Mjesnih zajednica za 2016. godinu i Plan i Program rada MZ za 2017. godinu.

Sjednici su pored vijećnika, Šefa službe za opću upravu, Bajazida Hadžalića, prisustvovali i predsjednici Mjesnih zajednica, osim predsjednika MZ Vođenica.

Nakon razmatranja Izvještaja o radu MZ, odlučeno je da se usvoje urađeni Izvještaji, a predsjednici MZ Krnjeuša, Vođenica i Grad I, su zaduženi da sazovu svoje Savjete i razmotre Plan i Program, te da predsjednik MZ Bravsko sazove Zbog građana.

Tematska sjednica je, na samom početku dopunjena sa izmjenom Zaključka od 9.3.2017. godine, u kojoj se obavezuje Služba za obrt, poduzetništvo, razvoj i poljoprivredu da kvartalno informiše vijeće o aplikacijama na raspisani javni poziv, a ne po svakom objavljenom Javnom pozivu, kako je prvobitno odlučilo Opštinsko vijeće.



Sjednica Opštinskog vijeća

Tematska sjednica o poljoprivredi

Dana, 17.5.2017. godine, u Sarajevu je održana Tematska sjednica Predstavničkog doma Parlamenta Federacije BiH.

Ovom prilikom se naš načelnik obratio Predstavništvu, a vezano za problem nastavka investiranja kompanije „Fana-Arifagić“, na prostoru naše Opštine.

Načelnik je istakao administrativne i druge barijere, te sporost odgovornih u smislu napora, kako bi ovaj veliki investitor nastavio ulagati svoja sredstva i zapošljavati ljude u našoj Opštini.

Nakon razgovora sa federalnim ministrom Šemsudinom Dedićem, premijerom Federacije BiH, Fadilom Novalićem, kao i Visokim predstavnikom Vaalentinom Inzkom, načelnik je konačno i ovdje ispričao istu priču, koju obilježavaju sitnosopstvenički, stranački i birokratski interesi.

Očekivati je da ovome neshvatljivom ponašanju dođe kraj.

Da li ćemo nakon ovoga dozvoliti da svaki budući investitor koji gradi i zapošljava, zaobilazi naš grad i ovu zemlju, dok istovremeno hiljade mladih je napušta?

Proizvodnja lana

Dana 25.4.2017. godine, u maloj Sali naše Opštine održan je sastanak predstavnika Službe za obrt, poduzetništvo, razvoj i poljoprivredu sa predstavnicima GIZ-a iz GEA-e Centar za istraživanje i studije, zadruga „Klekovača“ i projektnog tima Opštine Petrovac.

Tema sastanka je bila projekat „Proizvodnjom lana do održivih radnih mjesta u poljoprivredi“, koji će Opština Petrovac, zajedno sa našom Opštinom provoditi narednih 20 mjeseci.

Opšti cilj mu je doprinijeti stvaranju održivih izvora prihoda od poljoprivrede za stanovništvo projektom obuhvaćenih opština (Drvar, Istočni Drvar, Ključ, Ribnik, Bosanski Petrovac i Petrovac), a kao krajnji cilj - razviti lanac vrijednosti u proizvodnji, preradi i distribuciji lana na području ovih opština, i omogućiti trajno zaposlenje za najmanje 60 poljoprivrednih proizvođača.

Predstavnici Službe su se obavezali na saradnju, i svaku moguću pomoć u identifikaciji i odabiru korisnika, te obukama koje slijede u narednom periodu.

Važno je istaći da je naša aplikacija jedina koja uključuje međuentitetsku i međuopštinsku saradnju.



Sastanak u maloj Sali

Regionalna konferencija o održivosti vodnih usluga u BiH

Dana, 5.4.2017. godine u Banjoj Luci je otvorena regionalna konferencija na temu „Održivost vodnih usluga u Bosni i Hercegovini, u organizaciji Udruženja za oblasti voda i zaštitu okoliša „Aquasan mreže BiH“, Udruženja „Vodovodi Republike Srpske“ i Udruženje poslodavaca komunalne privrede Federacije Bosne i Hercegovine.

Pored predstavnika entitetskih i kantonalnih ministarstava poljoprivrede, vodoprivrede i šumarstva, predstavnika javnih, vodovodnih i komunalnih preduzeća iz BiH, kao i njihovih osnivača, jedinica lokalne samouprave, predstavnika nevladinih organizacija, privatnih i javnih sektora, prisustvovali su i načelnik naše Opštine, Zlatko Hujić i Šef PIT tima, Huse Jukić.

Cilj konferencije je podržati komunalna preduzeća i jedinice lokalne samouprave u BiH da aktivno izgradjuju svoje organizacione, institucionalne i ljudske kapacitete.

Najvažnije regionalne programe i projekte vezane za pružanje vodnih usluga, na konferenciji su prezentirali predstavnici Dunavskog vodnog programa, Otvorenog regionalnog fonda za modernizaciju opštinskih usluga, te Aquasan mreža u BiH.

Ova konferencija je od velikog značaja za Opštinu Bosanski Petrovac, radi izgradnje prečišćivača za otpadne vode.

Načelnik Hujić na sastanku kod premijera Novalića

Dana, 9.5.2017. godine, načelnik Hujić je prisustvovao sastanku u Sarajevu, sa Premijerom Federacije, Fadilom Novalićem, na kojem se razmatrao problem investitora Jusufa Arifagića, u Bosanskom Petrovcu.

Sastanku su prisustvovali investitor Jusuf Arifagić, i načelnik Općine Bosanska Krupa, Armin Halitović.

Probleme i opstrukcije koje ima sa dodjelom poljoprivrednog zemljišta, kako kaže investitor, nije mogao riješiti na lokalnom nivou: „Ja sam čovjek koji je došao u svoju BiH da investira srcem, a ne hladne glave. Jer, ako investiraš hladne glave, zakoni ekonomije su neumoljivi. Čovjek ne bi trebao ovdje investirati s obzirom na trenutno stanje. Ali evo, obećanje Premijera je da će se on uključiti u ovo sa Federalnom vladom, da se u što kraćem roku nađe rješenje“, ističe Arifagić.

Tokom razgovora Premijeru su predložili da Vlada sufinansira nabavku stočne hrane za ovu godinu, ali i riješi problem sa lokalnom zajednicom, u vezi sa dodjelom zemljišta.

Načelnik Hujić je istakao kako što prije treba iznaći rješenje, jer nema smisla ugroziti djelovanje ovakvog jednog investitora u opštini, ali i u zemlji gdje je sve više nezaposlenih stanovnika.

S druge strane, Arifagić navodi kako će zaposliti novih 300 ljudi, samo ukoliko mu se dozvoli da nesmetano radi i iskoristi postojeće kapacitete, s obzirom da je i u Bosanskoj Krupi slična situacija.



Na sastanku kod premijera Novalića

Pozitivno ocijenjen parking iza supermarketa „Tropic“

Krajem prošlog mjeseca, predstavnici Ministarstva za građenje, prostorno uređenje i zaštitu okoliša Unsko-sanskog kantona su bili u monitoringu, te su nakon obilaska, pozitivno ocijenili završeni projekat izgradnje parkinga iza supermarketa „Tropic“, u našoj opštini.

Svima nam je poznat taj dio užeg centra grada, kako je izgledao nekad, a kako izgleda danas.

Naime, za asfaltiranje parking prostora dio sredstva je obezbijeđen iz tzv. ekoloških naknada, sredstva koja se uplaćuju od pravnih i fizičkih osoba zagađivača i korisnika okoliša pri registraciji motornih vozila.

Podsjećamo da je prošle godine u septembru potpisan Ugovor o dodjeli sredstava iz ekoloških naknada za 2016. godinu između Ministarstva za građenje, prostorno uređenje i zaštitu okoliša Unsko-sanskog kantona i naše Opštine.

Dobivena sredstva Opština koristi, uz vlastito sufinansiranje, kako bi uredila i očuvala gradsku infrastrukturu, a sve u cilju funkcionalnijeg i ugodnijeg ambijenta za življenje svih građana.



Svi zadovoljni novim izgledom parkinga

Novi projekti

Dana, 8.5.2017. godine u kabinetu načelnika Hujića upriličen je sastanak na kome su prisustvovali predstavnici Razvojne agencije USK-a, predstavnici Služe za obrt, poduzetništvo, razvoj i poljoprivredu, i načelnik Zlatko Hujić.

Tema sastanka bila je Program javnih investicija. Ovaj Program omogućava mrežni pristup za planiranje i praćenje projekata koji doprinose realizaciji ciljeva u svrhu regionalnog razvoja, čemu svi težimo.

Razgovaralo se o novim projektima i programima za privrednike, čija će vrijednost biti oko 150.000 KM, a na koje će moći aplicirati i privrednici naše Opštine.

Naime, Razvojna agencija Unsko-sanskog kantona je Odlukom Vlade USK, 2014. godine imenovana kao nadležna institucija za vođenje Programa javnih investicija.



Na sastanku u Kabinetu načelnika

Pozitivni rezultati za KES „Crni vrh“ i Čardaklije

Dana 14.4.2017. godine Via Dinarica-platforma za održivi razvoj turizma i lokalni ekonomski rast je objavila rezultate Javnog poziva za dostavljanje projektnih prijedloga za unapređenje turističke smještajne infrastrukture, ponude i usluga duž zelene i bijele staze Via Dinarice u Bosni i Hercegovini, objavljenog 9.2.2017. godine.

Javnim pozivom obuhvaćene su tri prioritne oblasti:

- » planinarski domovi/kuće/skloništa,
- » privatni turistički smještajni objekti,
- » pružatelji turističkih usluga.

U okviru druge prioritne oblasti za finansiranje odobren je projektni prijedlog „Proširenje smještajnih kapaciteta“ čiji je nosilac seosko domaćinstvo „Čardaklije“, a u trećoj prioritnoj oblasti je odobrena „Revitalizacija i obnavljanje postojećih planinarskih staza, te proširenje turističke ponude

sa paragliding poletištem i smjerovima za sportsko penjanje“, čiji je nosilac KES „Crni vrh“.

Od pristiglih 61 projektnih prijedloga, za finansiranje je odobreno 36 najkvalitetnijih, od kojih su projektni prijedlozi iz naše Opštine, prvi na listi, u okviru svojih oblasti.

Posjeta njemačke ambasadorice

Dana 19.5.2017. godine, ambasadorica Njemačke, Christiane Hohmann je posjetila Opštinu Bosanski Petrovac, gdje je razgovarala sa načelnikom Opštine Zlatkom Hujčićem.

Razgovaralo se o realizovanim projektima u kojima je učestvovala njemačka Vlada, kao i o nekim budućim.

Načelnik Hujčić je ambasadoricu upoznao sa aktuelnom situacijom u našoj Opštini, i planovima naše administracije za naredni period, te o bogatoj kulturi i naslijeđu po kojoj smo specifični i prepoznatljivi u svijetu. Tu su, prije svega Bosanskopetrovački velikani, čija djela prelaze granice naše države.

Također, bilo je razgovora o pokretu nezavisnih načelnika, kojem pripada i načelnik naše Opštine, kao i o ignorisanju presude Ustavnog suda, koja se tiče eksploatacije šuma, od strane kantonalnih vlasti. Ambasadorica je posebno podržala aktivnosti vezano za prošle i buduće projekte u jednoj povratničkoj Opštini kao što je Bosanski Petrovac.

U tom cilju je obećala pomoć njemačke Vlade, za nove donacije i grantove.

Ambasadoricu je zanimalo koji su to potencijali kojim raspolaže naša Opština, te u kojoj bi se sferi mogla ostvariti zanimljiva saradnja.

Zahvalivši se ambasadorici Hohmann na posjeti, načelnik Hujčić je kazao da ga raduje spremnost Njemačke u podršci razvoju lokalne zajednice, konkretno naše Opštine, koja pruža velike mogućnosti za saradnju.



Načelnik Hujčić i njemačka ambasadorica

Posjeta biskupa Franje Komarice

Biskup banjalučki mons. dr. Franjo Komarica boravio je u petak, 19.5.2017. godine u našoj Opštini.

Tom prigodom, u kabinetu načelnika Hujčića, upriličen je prijem za biskupa i njegove velečasnike.

Ovo nije prvi susret načelnika Hujčića i Komarice. Podsjećamo da je prošle godine na inicijativu biskupa Komarice, izvršeno ograđivanje zapuštenog katoličkog groblja u našoj Opštini, gdje je načelnik Hujčić izrazio spremnost uvažavanja i djelovanja prema ovom prijedlogu.

U prijateljskom razgovoru, pored ostalih tema, predstavljen je projekat izgradnje kapelice, na ovom groblju, koji će biti uskoro realizovan.

Osim toga, bilo je riječ o aktuelnoj političkoj situaciji i problemima sa kojima se naša Opština suočava, a tiču se neprovođenja presude Ustavnog suda vezano za šume i neshvatljive opstrukcije investitora Arifagića.



U kabinetu načelnika Hujčića

Dan Opštine Bosanski Petrovac

Povodom obilježavanja 25. maja, Dana Opštine Bosanski Petrovac, juče je u 12 časova upriličeno polaganje cvijeća na spomen obilježjima: na Trgu šehida, ispred zgrade Opštine, Biblioteke „Skender Kulenović“, mjestu spajanja 5. i 7. Korpusa, u Gorinčanima, i na partizanskom groblju.

Polaganju je prisustvovao načelnik Opštine, Zlatko Hujčić, sa svojim saradnicima, i ostalim predstavnicima kulturnog i javnog života naše Opštine.

Nakon toga, u večernjim satima, u Domu kulture je održana Svečana sjednica Opštinskog vijeća, tokom koje su održani i prigodni govori.

Osim građana Bosanskog Petrovca i vijećnika, kao gost je prisustvovao i načelnik Bužima, gospodin Zikrija Duraković.

Poželim svim građanima sretan Dan Opštine, načelnik Hujčić je govorio o prethodno realizovanim aktivnostima, projektima. Također je spomenuo i probleme s kojima se naša Opština u

posljednje vrijeme susreće, izdvojivši i gorući problem šuma, koji svakim danom postaje sve veći, ali i opstrukcije od strane nekih vijećnika, koji time usporavaju i unazađuju nastavak razvoja i progresa naše Opštine.

Nakon Svečane sjednice, brojni gosti su uživali u kulturno-zabavnom programu.

Nastupali su učenici osnovne i srednje škole, kao i Umjetničke škole Bihać, područno odjeljenje Bosanski Petrovac.

Svojim nastupima učenici su kroz recitale, pjesmu, igru i ples, pokazali koliko vole svoj grad, pa su bili nagrađeni gromoglasnim aplauzom, na kraju.



Recitacija...



Gluma i pjesma...



Igra, ples...

Obilježena godišnjica Armije BiH u Bosanskom Petrovcu

Polaganjem cvijeća i odavanjem počasti, Fatihom i Minutom šutnje, obilježen je Dan Armije BiH u našoj Opštini.

Cvijeće su položili i počast odali na spomen obilježjima: Trgu Šehida, mjestu spajanja 5. i 7. korpusa, spomeniku žrtvama rata kod spomen-kuće Skendera Kulenovića, spomeniku žrtvama u Gorinčanima, i u Rašinovcu, predstavnici naše Općine, boračkih udruženja, političkih partija, civilnog društva, te porodice i saborci poginulih boraca i šehida.

Petnaesti april se obilježava kao Dan Armije, u sjećanje na 15. april 1992. godine, kada su po Odluci Predsjedništva RBiH sve oružane jedinice ujedinjene u jednu oružanu vojsku, Armiju Republike Bosne i Hercegovine.

Izložba fotografija u Domu kulture „Harmonija različitosti“

U organizaciji JU „Centra za kulturu i obrazovanje“ i Odbora za međureligijsku saradnju Bihać, a uz podršku OSCE Misije u BiH, sinoć je u Domu kulture otvorena izložba fotografija pod nazivom „Harmonija različitosti“.

Mnogobrojnim građanima, predstavnicima kulturnog, javnog i političkog života naše Opštine, predstavnicima Odbora za međureligijsku saradnju iz Bihaća, kao i predstavnicima OSCE Misije u BiH, obratili su se Marijo Plavčić, iz katoličke vjerske zajednice, Mirzet efendija Spahić, iz islamske vjerske zajednice, pravoslavni sveštenik Bojan Mitrić, predsjedavajuća Opštinskog vijeća Nikolina Simić, te ispred načelnika Opštine, Nevsad Ramić.

U kulturno-umjetničkom djelu programa predstavili su se učenici Mješovite srednje škole, sa recitalom, učenici Niže muzičke škole, te djevojke i momci folkolora koji djeluje pri „Centru za kulturu i obrazovanje“.

Izložbu 40 fotografija vjerskih objekata islamske, katoličke, pravoslavne i jevrejske zajednice svečano je otvorila v.d. direktora Ansel Husetić, istaknuvši da je izložba postavljena na pravom mjestu i u pravom gradu, jer je Bosanski Petrovac pravi primjer suživota i vjerske tolerancije.

Izložba će biti otvorena narednih sedam dana, a svi zainteresovani posjetitelji fotografije će moći pogledati radnim danom u periodu od 7 sati do 15:30.

Iz Bosanskog Petrovca sinoć je poslata jedna poruka: **Nije važno koje smo vjere, kako nazivamo Boga kojem se molimo, na koji način se molimo, treba da se međusobno uvažavamo, širimo poštovanje, prijateljstvo, suživot i toleranciju.**

„Jedna bašta ljepše izgleda i bolje miriše sa četiri različita cvijeta, za razliku od bašte sa jednim cvijetom“, u svom obraćanju istakao je Nevsad Ramić.



Izložba u Domu kulture

Blizu 200 godina suživota

Svoj dijamantski pir, 65. godišnjicu, ove godine proslavlja bračni par **Družić, Kadira i Safet**. Kadira je porijeklom iz Bosanskog Petrovca, a djevojačko prezime joj je Hasedžić. Oboje imaju po 84 godine, a plod njihovog zajedništva, ljubavi i poštovanja su Esmā, Esad i Šero, njihova djeca.

Bosanski Petrovac je kao po nekom nepisanom pravilu „rasadnik“ talenata i intelektualaca iz svih oblasti. Velika imena kojima se ova zemlja ponosi dolaze iz našeg grada. Među tim imenima je i Suljo Linić, jedan od šestoro unučadi Safeta i Kadire Družić, sin kćerke Esme. Prof.dr. Suljo Linić je naučnik svjetskog renomea, a danas je profesor na Univerzitetu Michigan, diplomirao je fiziku i hemiju na West Chester univerzitetu u SAD-u, doktorirao na Delavare univerzitetu, a Postdoktorski rad odbranio je na Fritz institutu u Berlinu... Inače, naša Opština mu je dodijelila Plaketu grada, 2014. godine.

Mile i Jela Bulajić, bračni par iz Brestovca, dana, 20.5.2017. godine su u svojoj porodičnoj kući proslavili 60. godišnjicu braka.

U prethodnih 60 godina bilo je i sreće i tuge, ali su onda kada ih život nije mazio bili jedno drugom najveći oslonac. Jedan od dvojice sinova, najmlađi Zdravko, koji živi u Srbiji, dolazi, redovno ih obilazeći, dovodeći sinove Milana i Miloša, da ne bi zaboravili svoje korijenje. Njihov najstariji sin, Ilija, je nažalost umro.

Sudbina ih je, kako Jela kaže spojila slučajno, dok je Jela dolazila u Brestovac, rodbini u posjetu.

„Milu sam upoznala kad sam dolazila kod svojih ujaka, pošto mi je majka rodom iz Brestovca. Kroz osmijeh Jela navodi: „Nije bio loš, bio je u licu crven, odmah se vidjelo da je zdrav“.

Prema njenim riječima, bez sloge, ljubavi i poštovanja nema ni dugovječnog braka. Jelu obuzme jeza kada čuje da se supružnici svađaju, da žene odlaze od svojih muževa ne boreći se da održe bračnu zajednicu.

„Takva su bila vremena, kako smo se svađali, tako smo se i mirili. Nisam pobjegla od đeda nikada, danas žene samo

kažu „ode ja“. Ja sam bila takvog karaktera, da nikad nisam ni pomislila da odem od mog Mile i moje djece“.

Jela ima 80 godina, rođena je u Bjelaju, djevojački se prezivala Radišić, a svoj život je posvetila djeci i kako ona kaže „svome Mili“, za kojeg tvrdi da je uvijek bio prema njoj dobar, te da se dobro brinuo o njoj i djeci.

Mile ima 87 godina, svoj radni vijek je proveo radeći u šumi, boreći se da obezbijedi pristojan život svojoj porodici. Pored teškog života, Mile nije izgubio smisao za zdrav humor. Tokom fotografisanja dodaje „i dan danas sam najljepši“, a možda to nije ni bila šala.

Ova priča pokazatelj je da prave vrijednosti i danas postoje, da za njih vrijedi živjeti, i poruka je svima nama da se za zlatne niti poštovanja i razumijevanja ni nakon 60 godina, hrđa/rđa ne hvata.

Svoj dijamantski pir Mile i Jela proslavili su u okruženju porodice i bliskih prijatelja, a proslavu su svojim dolaskom uveličali i načelnik Opštine, Zlatko Hujić, u pratnji supruge i kćerke, kao i Boro Banjac, predsjednik Udruženja Petrovčana u Beogradu. Osim bliže rodbine, kao bliski prijatelj je bio i Momir Kecman, bivši svjetski šampion u rvanju.

Jungić Jakov i Ankica ove godine proslavljaju zlatni pir, 54. godišnjicu braka, u svojoj porodičnoj kući, u našoj Opštini. Ankica je porijeklom iz Bihaća. I Ankica i Jakov imaju po 87 godina. Djeca, Velimir i Vesna ih redovno posjećuju, dovodeći im petoro unučadi, da ne zaborave naš grad i mjesto odaklen im potiču baka i djed.

Opština Bosanski Petrovac, na čelu sa načelnikom Hujićem, bračnim parovima je poklonila po tortu i cvijeće, kao znak pažnje za prave vrijednosti koje nam trebaju biti primjer suživota.

Ovi dugogodišnji supružnici plijene iskustvom, razumom i ljubavlju koja ne poznaje nikakve barijere- religiozne i nacionalne, naročito.

Da li je potrebno ovoliko vremena, svima nama danas, da postanemo i ostanemo, kao ovi divni ljudi?


Odlazeći od slavljenika, poželili smo im dobro zdravlje, svaku sreću i dug život.



Kadira i Safet Družić



Mile i Jela Bulajić



Ankica i Jakov Jungić

Prvomajske trke

Dana, 8. 5.2017. godine na Gradskom trgu su održane tradicionalne Prvomajske ulične trke.

Trkama je prisustvovao veliki broj Petrovčana, koji su se skupili, na dugo iščekivanom lijepom vremenu, da bodre takmičare.

Generalni sponzor ove manifestacije je Pirnar d.o.o Kolunić, čiji je direktor obezbijedio majice za prva tri mjesta u svim kategorijama, međutim, svoj doprinos su dali i ostali privrednici naše Opštine.

Organizator i ovogodišnjih Prvomajskih uličnih trka bio je Sportski savez Bosanski Petrovac.

Održano je 14 trka- od predškolskog uzrasta do seniora. Pobjednicima su na kraju, svečano i na bini, uručene medalje, diploma i majice.

Podsjećamo da su se Trke trebale održati 28. aprila, ali zbog vremenskih neprilika su bile odgođene.

Predškolski uzrast:

1. Sejla Hukić
2. Mirjana Solomun
3. Lorena Grahovac

1. Anur Ferizović
2. Duško Mrđa
3. Nedim Terzić

Prvi i drugi razred:

1. Sumeja Ganibegović
2. Ajla Hrkić
3. Milica Arsenić

1. Edhem Hujčić
2. Haris Hrkić
3. Miljan Kecman

Treći i četvrti razred:

1. Ena Ogrić
2. Katarina Smiljanić
3. Jovana Banjac

1. Luka Jeličić
2. Todor Radošević
3. Ekrem Hamzić

Šesti razred:

1. Esma Bolić
2. Kristina Šobot
3. Saldina Poturović

1. Amer Hidić
2. Dejan Repac
3. Tarik Mešić

Sedmi i osmi razred:

1. Anđela Branković
2. Sumea Kebić
3. Anesa Hadžić

1. Zdravko Kecman
2. Edis Delić
3. Muhamed-Ramo Jaganjac

Deveti razred:

1. Erna Velagić
2. Jovana Šobot
3. Amina Spahić

1. Ajdin Redžić
2. Milan Repac
3. Almedin Kahrić

Seniori:

1. Ajla Mustafi
2. Aneta Ferizović
3. Ivana Grbić

1. Samir Delić
2. Mersim Zajkić
3. Sabahudin Šomić

Dan škole

Dana 10.5.2017. godine JU Mješovita srednja škole „Bosanski Petrovac“ svečano je obilježila Dan škole.

U sklopu obilježavanja zvanično je otvoren rekonstruisani dio košarkaškog igrališta, koji se nalazi nadomak škole.

Svečano presijecanje vrpce obavili su Ministar obrazovanja, kulture i sporta, Muhamed Ramić, i načelnik Opštine, Zlatko Hujić.

„Prvi dio dana obilježavanja je protekao radno, radili smo do 12 sati, a nakon toga smo svečano otvorili košarkaško igralište. Sredstva za rekonstrukciju smo obezbijedili preko Federalnog ministarstva kulture i sporta, ali iz vlastitih sredstava škole. Zahvaljujemo Opštini Bosanski Petrovac na osvjetljavanju igrališta, i Sportskom savezu na dobrovoljnom radu sa uposlenicima škole“, istakla je direktorica MSSŠ, Besima Kišljen.

„Na zadovoljstvo svih građana, posebno učenika, a zahvaljujući dobroj koordinaciji sa ministrastvima, izvršena je rekostrukcija ovog igrališta. Ovo su lijepi trenuci za nas sve“, kazao je načelnik Hujić, poručujući učenicima da uče i rade, jer je to jedini put do boljeg i kvalitetnijeg života.

Nakon toga, uslijedila je košarkaška utakmica, a potom prezentacija dosadašnjih aktivnosti srednje škole, kao i nastup učenika.



Dječaci...



Djevojčice...



Presijecanje vrpce, načelnik Hujić i ministar Ramić



Utakmica na obnovljenom igralištu

Prezentacija šumarskog fakulteta maturantima šumarske škole

Dana 19.4.2017. godine u prostorijama srednje škole od strane predstavnika Šumarskog fakulteta iz Banja Luke, na čelu sa dekanom Dukićem, održana je prezentacija fakulteta maturantima šumarske škole.

Tom prilikom predstavljeni su studijski programi, projekti i aktivnosti fakulteta, kao i novi smjer.

„Bilo mi je posebno zadovoljstvo da u moje rodno mjesto dođem i prezentujem šumarski fakultet, i šta on nudi budućim studentima. Imamo dva studijska smjera, to je šumarstvo, opšte šumarstvo i od ove godine imamo novi smjer, a to je prerada drveta. Ovaj smjer koji se odnosi na preradu drveta je posebno atraktivan jer prema našim istraživanjima tog kadra nema na evidencijama biroa u BiH. Osigurali smo prostor, eminentne profesore, tako da kvalitet nastave neće izostati“, istakao je dekan Dukić.

Tokom zajedničkog razgovora, učenici su bili zainteresovani, te su pitanjima uspješno dolazili do željenih informacija.

„Prisustvovala sam prezentaciji i mnogo mi se sviđela. Zainteresovana sam za ovaj fakultet, posebno sam zadovoljna što sam uspjela dobiti odgovor na pitanja koja su me zanimala“, rekla je Marjanović Mirjana, učenica četvrtog razreda šumarske škole.

„Prvi dojam je da učenici Bosanskog Petrovca imaju interesovanja i nadam se da ću ih vidjeti na prijemnom ispitu, a kasnije i na predavanjima“, završio je dekan.

Zanimljiva činjenica je da dekan Dukić nosi korijenje svog porijekla sa naših krajeva, kao i njegov mladi pripravnik, jedan od prezentatora, Milan Stojanović.

Dokaz je ovo, još jednom, da naša Opština, zaista predstavlja kolijevku pametnih ljudi.



Prezentacija u srednjoj školi

Predramazanski prijem

Načelnik Općine Bosanski Petrovac Zlatko Hujčić, u povodu početka mjeseca Ramazana priredio je prijem za predstavnike Islamske zajednice u Bosanskom Petrovcu, predvođene glavnim imamom.

Tradicionalni Ramazanski prijem organiziran je u kabinetu načelnika, kojem su prisustvovali Mirzet ef. Spahić, glavni imam Medžlisa, te imami džemata u Bosanskom Petrovcu.

„Ovaj prijem sam iskoristio da bi sa dužnosnicima u Islamskoj zajednici razgovarao o aktualnim pitanjima, koji se tiču rada Islamske zajednice, o potrebama džemata, posebno sada kada dolazi mjesec Ramazan. Lično sam iskazao svoju želju da im i ovogodišnji post bude olakšan, kao i svim muslimanima u Bosanskom Petrovcu“- rekao je načelnik Hujčić.

Tokom razgovora predstavljen je plan ramazanskih aktivnosti koje će se organizirati u Bosanskom Petrovcu tokom cijelog mjeseca, kao i bajramska svečanost koja će obilježiti kraj ovog mubarek mjeseca.

Predstavnici IZ zahvalili su se načelniku Hujčiću na prijemu, ističući primjernu saradnju Općine Bosanski Petrovac i institucija Islamske zajednice, koja je u Bosanskom Petrovcu, kao istinske multietničke sredine, od izuzetne važnosti.



Predramazanski prijem kod načelnika

“RASTIMO UZ PJESMU I PLES”

Dana, 24.5.2017. godine, građanke i građani Bosanskog Petrovca imali priliku uživati u nastupu najmlađih i najdražih stanovnika našeg grada – djece iz vrtića JU „Dječji vrtić“ Bosanski Petrovac. Zajedno sa svojim vrijednim tetama uzeli su učešće u priredbi koja se već četvrtu godinu zaredom održava pod nazivom „Rastimo uz pjesmu i ples.“

Kako nam je rekla direktorica vrtića Zlata Balić, ova priredba se već tradicionalno simultano održava u svim gradovima

cijele BiH, gdje vrtićka djeca svake godine u isti dan i sat plešu na gradskim trgovima odjevena jednako u žute majice i uz iste pjesmice i koreografiju. „Zajedničkom aktivnošću dogovoreno je da prvog juna u sedam sati u svim gradovima Federacije, Republike Srpske i Distrikta Brčko djeca nastupe na trgovima odjevena jednako i uz isti repertoar pošalju poruku da rastu zajedno uz pjesmu i ples,“ kazala je gospođa Balić.

Poželimo našim malim sugrađanima sretno djetinjstvo u njihovom Bosanskom Petrovcu uz što više pjesme, plesa i smijeha i zahvalimo osoblju dječjeg vrtića na krasnoj priredbi koju su nam priredili.



Naši najmlađi i najsladji...

Nove svlačionice

U toku je sanacija objekta svlačionica Nogometnog kluba „Mladost“ Bosanski Petrovac.

Podsjećamo da je, dana 21. decembra, načelnik Zlatko Hujčić sa Federalnim ministarstvom kulture i sporta potpisao Ugovor vrijednosti 10.500 KM za sanaciju.

Sanaciju, pored Federalnog ministarstva finansira i naša Opština. Izvođač radova doo “Gratod” Banja Luka ima rok od 30 dana da izvrši postavljanje vanjske stolarije prozora i vrata, sanitarija, zidova, keramike, električnih bojlera, tuševa, u okviru predviđenih sredstava.

Realizacijom projekta će se steći osnovni uslovi, kako za našu djecu, tako i za djecu koja dolaze iz drugih opština i država na različite sportske manifestacije i takmičenja.

Sanacija svlačionica nije samo puko renoviranje neuslovnih prostorija, devastiranih i nehigijenskih podova, pločica, tuševa, i kupatila, već mnogo više od toga... To je početak napora u cilju očuvanja jedinog sportskog stadiona koji postoji u našoj Opštini

i koji ima ulogu da okupi i animira mlade ljude, omogući im da se druže i takmiče, te razvijaju svoje tijelo i sportski duh.



Radovi u toku...

Šesti "Petrovački uranak"

Udruženje Petrovčana Novi Sad, i ove godine su, u nedjelju, 28.5.2017. godine organizovali 6. tradicionalni "Petrovački uranak", u mjestu Andrevlje, nadomak Novog Sada.

Pored velikog broja prisutnih Petrovčana, koji su srcem i mislima i taj bili dan u svom zavičaju, tradicionalnoj manifestaciji prisustvovali su i predstavnici opštine Bosanski Petrovac.

"Čast mi je što sam i ove godine svjedok da ovi vrijedni ljudi nisu zaboravili svoje rodno mjesto i svoje običaje. Obećavam da ćemo nastojati upriličiti, početkom avgusta, u Bosanskom Petrovcu druženje, na koje će biti pozvani predstavnici Udruženja Petrovčana iz Beograda i Novog Sada, istovremeno", izjavio je načelnik Hujčić.

Šesti tradicionalni „Petrovački uranak“, propratio je i bogat sportski program: fudbal, odbojka, nadvlačenje konopca, kličak, kao i takmičenje u košenju.

Potom, druženje se nastavilo u veselom tonu, uz pjesmu i ples, te ugodne razgovore zemljaka, čije je zajedništvo i saradnja garancija da im zavičaj nikada neće pasti u zaborav.



Na "Petrovačkom uranku"...

Rvački turnir u Sarajevu

U Sarajevu je u subotu 8.aprila, u Olimpijskoj dvorani „Zetra“ održan XI MEĐUNARODNI TURNIR GRADA SARAJEVA u rvanju grčko – rimskim stilom za dječake i kadete: „**KUP SARAJEVA 2017**“. Organizator turnira je Hrvatski klub „Bosna“, a učešće su uzeli dječaci starosti od 1997-2008. godišta.

Turnir je bio međunarodnog karaktera. Pored 6 domaćih ekipa, na turniru su učestvovala ekipe iz Srbije, Hrvatske, Slovenije, Bugarske i Ukrajine. Na borilište je izašlo 106 takmičara iz 15 klubova.

Rvački klub „GRMEČ“ – Bos. Petrovac se po prvi put pojavio na ovom turniru. Na borilište je izašlo 8 naših takmičara u 3 kategorije i to:

Kategorija dječaci:	(28 kg):	- Mamukić Mirnes
		- Gutlić Ensar
	(35 kg):	- Hidić Amer
	(44 kg):	- Arnautović Harun
Kategorija mlađi dječaci:	(62 kg):	- Kecman Ranko
	(70 kg):	- Kovačević Aleksa
Kategorija kadeti:	(63 kg):	- Kecman Marko
	(84 kg):	- Hujčić Alen

Što se tiče plasmana, naši takmičari su osvojili **5 medalja**. Od toga **2 zlatne, 1 srebrna i 2 bronzane**.

Prvo mjesto (zlatne medalje) u svojim kategorijama osvojili su **Mirnes Mamukić i Aleksa Kovačević**.

Drugo mjesto (srebrna medalja) osvojio je **Ensar Gutlić**.

Treće mjesto (bronzane medalje) u svojim kategorijama osvojili su **Harun Arnautović i Ranko Kecman**.

Odlukom organizatora, **specijalnu nagradu (bronzana medalja)** za borbenost dobio je **Alen Hujčić**.

Ovo je odličan uspjeh naših takmičara. Ovakav rezultat posebno dobija na značaju kada se uzme u obzir da je većini naših takmičara ovo bio prvi izlazak na neki turnir.



Rvački klub "Grmeč"

Velikani u snijegu...



Petrovački runolisti...

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski
Petrovac od 15:00-17:00,
svakim danom na 90.9 MHz fm